

بِسْمِ اللَّهِ الرَّحْمَنِ الرَّحِيمِ
نَحْمَدُهُ وَنُصَلِّي عَلَى رَسُولِهِ الْكَرِيمِ

সংক্ষিপ্তসার খুতবা জুমআ

উহুদের যুদ্ধের প্রেক্ষাপটে মহানবী (সা.) এর উত্তম আদর্শ ও ব্যক্তিত্ব
এবং প্যালেস্টাইনের নিরাপরাধদের উদ্দেশ্যে বিশেষ দোয়ার আবেদন।

সৈয়দনা হযরত আমীরুল মুমিনীন হযরত মির্যা মাসরুর আহমদ খলিফাতুল মসীহ আল্
খামেস আইয়াদাুল্লাহু তাআলা বেনাসরিহিল আযিয কর্তৃক ২২ ডিসেম্বর, ২০২৩ ইং তারিখে
যুক্তরাজ্যের (টিলফোর্ড) ইসলামাবাদের মসজিদে মুবারকে প্রদত্ত খুতবা জুমআর সংক্ষিপ্তসার
আশ্হাদু আল্লাহ ইলাহা ইল্লাল্লাহু ওয়াহ্দাহু লাশারীকালাহু, ওয়াশ্হাদু আন্বা মুহাম্মাদান আবদুহু ওয়ারসূলুহু।
আম্বাবাদু ফা-আউযুবিল্লাহি মিনাশ শয়তানির রজিম, বিসমিল্লাহির রহমানির রহিম। আল্হামদু লিল্লাহি
রব্বিল ‘আলামিন। আর রহমানির রহিম। মালিকি ইয়াওমিদ্দিন। ইয়্যাকা না’বুদু ওয়া ইয়্যাকা নাস্তাঈ’ন।
ইহদিনাস সিরাত্বাল মুসতাক্বীম। সিরাত্বাল লাযীনা আনআ’মতা আ’লাইহিম। গায়রিল মাগদূবি ‘আলায়হিম।
ওয়ালাদদল্লীন।

তাশাহুদ, তা’উয ও সূরা ফাতিহা পাঠের পর সৈয়দনা হুযুর আনোয়ার (আই.) বলেন :

সাম্প্রতিক খুতবায় উহুদের যুদ্ধের ঘটনাবলি বর্ণনা করা হচ্ছে। ইতঃপূর্বে বর্ণনা করা হয়েছে,
মুসলমানরা মূল যুদ্ধে কাফিরদের পরাস্ত করেছিল এবং তাদের ব্যাপক ক্ষয়ক্ষতি সাধন করেছিল। কিন্তু
মহানবী (সা.)-এর কঠোর সতর্কবাণী সত্ত্বেও যখন গিরিপথের সুরক্ষায় নিয়োজিত অধিকাংশ তিরন্দাজ সেটি
ফাঁকা রেখে চলে যায় তখন শত্রুরা সেই পথ দিয়ে আক্রমণ করে মুসলমানদের ব্যাপক ক্ষয়ক্ষতি সাধন
করে।

মুশরিক বাহিনীর নয়জন পতাকা বাহক যখন একে একে নিহত হয় এবং আর কেউ সেই পতাকা
তুলে ধরার সাহস পাচ্ছিল না, তখন তারা পিছু হটতে আরম্ভ করে এবং রণক্ষেত্র থেকে পালাতে থাকে। যে
নারীরা দাফ বা ঢোলবাদ্য বাজিয়ে যোদ্ধাদের উৎসাহ দিচ্ছিল তারাও সব ছেড়েছুড়ে পেছনের পাহাড়ের
দিকে পালাতে থাকে। মুসলমানরা তাদের অস্ত্রশস্ত্র ও অন্যান্য যুদ্ধলব্ধ সম্পদ একত্রিত করতে থাকে। তখন
আব্দুল্লাহ বিন জুবায়ের (রা.)’র নেতৃত্বে গিরিপথের সুরক্ষায় নিয়োজিত তিরন্দাজ বাহিনীর পঞ্চাশজনের
মধ্যে প্রায় চল্লিশজন তাদের সাথে যোগ দেয়ার জন্য ছুট দেয়। যদিও মহানবী (সা.) তাদেরকে অত্যন্ত
কড়াভাবে বলে দিয়েছিলেন, তাঁর (সা.) নির্দেশ না পাওয়া পর্যন্ত যেন তারা কোনোভাবেই সেই স্থান ত্যাগ না
করে এবং তাদের দলনেতা হযরত আব্দুল্লাহ বিন জুবায়ের (রা.)ও তাদেরকে রসূলুল্লাহ (সা.)-এর হুঁশিয়ারি
স্মরণ করিয়ে স্ব-স্ব অবস্থানে অনঢ় থাকার নির্দেশ দিয়েছিলেন- কিন্তু সেই সাহাবীরা বলেন, ‘মুশরিকরা তো

পরাজিত হয়েই গিয়েছে; এখন আমরা আর এখানে দাঁড়িয়ে কী করব?’ এই বলে তারাও পাহাড় থেকে नीচে নেমে যুদ্ধলব্ধ সম্পদ জড়ো করতে থাকেন। তবে আব্দুল্লাহ বিন জুবায়ের (রা.)সহ কয়েকজন নিজেদের অবস্থান অর্থাৎ গিরিপথেই অটল থাকেন।

অধিকাংশ ঐতিহাসিক ও জীবনীকার মন্তব্য করেছেন, সেই সাহাবীরা নাকি যুদ্ধলব্ধ সম্পদের লোভে নিজেদের স্থান ত্যাগ করেছিলেন। অধিকাংশ বইপুস্তক ও তফসীরে বিশেষভাবে সূরা আলে ইমরানের ১৫৩নং আয়াতের অধীনে লেখা হয়েছে, সেই সাহাবীরা মালে গণিমতের লোভে তাড়াহুড়ো করেছিলেন, কিন্তু সাহাবীদের যে মর্যাদা পবিত্র কুরআন বর্ণনা করেছে- তার ভিত্তিতে এরূপ ব্যাখ্যা সঠিক বলে মনে হয় না। হুযূর (আই.) এ প্রসঙ্গে সূরা আলে ইমরানের ১৫৩নং আয়াতটি সম্পূর্ণ উদ্ধৃত করে কুরআনেরই ভাষ্য থেকে ও হযরত মুসলেহ্ মাওউদ (রা.)’র তফসীরের অপ্রকাশিত নোটের আলোকে এই ভ্রান্তির অপনোদন করেন। উক্ত আয়াতে এরূপ শব্দাবলি বিদ্যমান, অর্থাৎ ‘তোমাদের মাঝে কেউ কেউ জগতের আকাঙ্ক্ষা রাখত এবং তোমাদের মাঝে কেউ কেউ পরকালের আকাঙ্ক্ষী ছিল’। কিন্তু এর এই অর্থ করা কিংবা এরূপ ধারণাও করা যে, সাহাবীদের যুদ্ধলব্ধ সম্পদের লোভ ছিল- এটি তাদের মর্যাদার চরম পরিপন্থী। তারা তো নিজেদের স্ত্রী-সন্তান এমনকি নিজেদের প্রাণ পর্যন্ত তাদের পরম প্রিয় ও প্রেমাস্পদ আল্লাহ ও তাঁর রসূল (সা.)-এর চরণে উৎসর্গীকৃত রেখেছিলেন, ধনসম্পদ তো সেখানে নিতান্ত তুচ্ছ।

যেমনটি উহুদের যুদ্ধের ইতিহাস থেকে জানা যায়, তারা তো শাহাদতের আকাঙ্ক্ষায় মদীনার বাইরে এসে যুদ্ধ করার জন্য ব্যাকুল ছিলেন। আর মুসলমানদের যুদ্ধসমূহ তো কোনোভাবেই সম্পদ অর্জনের জন্য যুদ্ধ ছিল না। আর যেখানে আল্লাহ তা’লা স্বয়ং উক্ত আয়াতে ঘোষণা দিয়ে দিয়েছেন অর্থাৎ ‘যা-ই ঘটেছে- আল্লাহ নিশ্চয়ই তোমাদের ক্ষমা করে দিয়েছেন’- সেক্ষেত্রে তাদের বিষয়ে এরূপ মন্দ ধারণা পোষণ করা নিতান্ত অন্যায্য। যে-সব ঐতিহাসিক ও মুফাসসীর এরূপ ধারণা ব্যক্ত করেছেন, সম্ভবত তারা সরলমনে কোনো রেওয়াজকে সঠিক ভেবে তা করেছেন। কিন্তু তারা বুঝতেই পারেন নি- এরূপ মন্তব্য আদতে সাহাবীদের ও মহানবী (সা.)-এর পবিত্রকরণ শক্তির বিষয়ে কত বড় আপত্তির কারণ হতে পারে। তার ওপর যেখানে সূরা নূরের ১৩নং আয়াতে আল্লাহ তা’লা বলেছেন, মু’মিনদের উচিত নিজেদের বিষয়ে সুধারণা পোষণ করা, সেক্ষেত্রে সাহাবীদের মহান আত্মত্যাগসমূহ দৃষ্টিপটে রেখে এমন ধারণা নিতান্তই অসমীচীন। আসলে সেই তিরন্দাজ সাহাবীরা অন্য সাহাবীদের সাথে বিজয়োল্লাসে যোগ দেওয়ার বাসনায় গিরিপথ ত্যাগ করে যুদ্ধক্ষেত্রে চলে গিয়েছিলেন। মিনকুম মাই ইয়ুরিয়দু দুনিয়া কথাটিতে জগৎ বলতে আসলে জাগতিক বিজয়োল্লাস বুঝানো হয়েছে, কারণ সেই সাহাবীদের আকাঙ্ক্ষা ছিল- আমরা যেন কাফিরদের পরাজিত করার ক্ষেত্রে পিছিয়ে না থাকি। তারা এজন্য গিয়েছিলেন যে, খোদার প্রতিশ্রুতি যে পূর্ণ হয়েছে- আমরাও তার সাক্ষী হই! কিন্তু আল্লাহ তা’লা বলেছেন, তা ঠিক হয় নি। মহানবী (সা.) তাদের যে নির্দেশ দিয়েছিলেন- সেটি পালন করাই ধর্মের সেবা ছিল, যুদ্ধ করাটা প্রকৃতপক্ষে ধর্মসেবা ছিল না! হযরত খলীফাতুল মসীহ আর-রাবে (রাহে.)ও এই ঘটনার বিষয়ে অনুরূপ অভিমত ব্যক্ত করেছেন।

হুযূর (আই.) উহুদের যুদ্ধের মোড় ঘুরে যাবার ঘটনাবলিও বিস্তারিত তুলে ধরেন। যখন সাহাবীরা সেই পাহাড়ের গিরিপথ অরক্ষিত রেখে নেমে আসেন তখন কুরাইশ বাহিনীর অন্যতম কমান্ডার খালিদ বিন

ওয়ালীদ সেই ফাঁকা গিরিপথ লক্ষ্য করে ইকরামাসহ অশ্বারোহী বাহিনী নিয়ে সেদিক থেকে আক্রমণ করে আব্দুল্লাহ বিন জুবায়ের (রা.) ও তার সাথীদের হত্যা করে অকস্মাৎ মুসলিম বাহিনীকে ঘেরাও করে ফেলে। মুসলমানরা আচমকা ঘাড়ের ওপর শত্রুদের আক্রমণোদ্যত দেখে হতভম্ব হয়ে ছত্রভঙ্গ হয়ে পড়ে এবং দিগ্বিদিক পালাতে থাকে। এই সুযোগে আমরা বিনতে আলকামা নামক এক মুশরিক নারী মাটিতে পড়ে থাকা তাদের রক্ত ও ধূলিমাখা পতাকাটি তুলে ধরে চিৎকার করে তাদের ডাকতে থাকে। পলায়নরত কুরাইশ বাহিনী তাদের রক্তে রঞ্জিত পতাকা আবার উড্ডীন দেখে ব্যাপারটা বুঝে নেয় এবং ফিরে এসে জোরালো আক্রমণ চালায়। সেদিন অনেক মুসলমান শহীদ হয়েছিলেন। মুসলিম বাহিনীর অবস্থা এতটাই বিশৃঙ্খল হয়ে পড়ে যে, ভুলক্রমে মুসলমানদের হাতেই কিছুমুসলমানও শহীদ হয়ে যান। হযরত হুযায়ফার পিতা ইয়ামান যিনি নিতান্ত বয়োবৃদ্ধ একজন সাহাবী ছিলেন এবং প্রথম থেকে যুদ্ধক্ষেত্রে ছিলেন না- মুসলমানদের করুণ পরিস্থিতি দেখে সাবেত নামক আরেকজন বৃদ্ধ সাহাবীকে সাথে নিয়ে যুদ্ধক্ষেত্রে ঝাঁপিয়ে পড়েন। কিন্তু মুসলমানরা ভুলক্রমে ইয়ামানকে হত্যা করেন। মহানবী (সা.) পরবর্তীতে হুযায়ফাকে তার পিতার জন্য রক্তপণও দিতে চেয়েছিলেন, কিন্তু তিনি মুসলমানদের এই ভুল ক্ষমা করে দেন ও রক্তপণ মাফ করে দেন। আর এরফলে আল্লাহ ও তাঁর রসূল এবং সাহাবীদের মাঝে হুযায়ফার সন্মান ও মর্যাদা অনেক বৃদ্ধি পায়।

মহানবী (সা.)-এর আপন চাচা ও দুধভাই হযরত হামযা (রা.)ও উহুদের যুদ্ধে শহীদ হন। তিনি কাফিরদের আকস্মিক আক্রমণ সত্ত্বেও বীরবিক্রমে যুদ্ধ করছিলেন। কুরাইশ পক্ষের কৃষ্ণাঙ্গ ক্রীতদাস ওয়াহশী তাকে হত্যার উদ্দেশ্যে গুঁৎ পেতে একপাশে বসে ছিল; সে সুযোগ পাওয়ামাত্র হাতে থাকা ছোট বর্শা তাক করে হযরত হামযা (রা.)'র উদ্দেশ্যে ছুঁড়ে মারে যা তার নাভির কিছুটা নীচে গিয়ে লাগে। হযরত হামযা (রা.)'র টলমল পায়ে কয়েকবার ঘুরে দাঁড়াবার ব্যর্থ চেষ্টা করে মাটিতে লুটিয়ে পড়েন ও শাহাদতের অমিয় সুধা পান করেন। তাঁর মৃত্যুর পর কাফিররা তাঁর নাক, কান কেটে লাশ বিকৃত করে; কেউ একজন তার বুক চিরে কলিজা বের করে আবু সুফিয়ানের স্ত্রী হিন্দ বিনতে উতবাকে দেয়, যে উর্দু বা বাংলায় হিন্দা নামেই অধিক পরিচিত; সে তা চিবিয়ে বিকৃত উল্লাসে মেতে ওঠে কিন্তু গলাধঃকরণে ব্যর্থ হয়। হযরত হামযা (রা.)'র শাহাদতের সংবাদে মহানবী (সা.) প্রচণ্ড দুঃখ পান এবং তাঁর লাশের সাথে হওয়া অন্যায আচরণের কথা জানতে পেরে স্বাভাবিক প্রতিশোধের স্পৃহায় ঘোষণা করেন, তিনিও (সা.) পরবর্তীতে সত্তরজন কুরাইশের লাশ বিকৃত করাবেন। কিন্তু আল্লাহ তাঁলা সূরা নাহলের ১২৭নং আয়াত অবতীর্ণ করে এমনটি না করার এবং ধৈর্য ধারণের উপদেশ দিলে তিনি (সা.) এই সংকল্প ত্যাগ করেন। হযরত হামযা (রা.)'র বোন ও মহানবী (সা.)-এর ফুফু হযরত সাফিয়াও এদিন অসাধারণ ধৈর্যপ্রদর্শন করেন। তিনি ভাইয়ের শাহাদতের সংবাদ শুনে ছুটে আসছিলেন। মহানবী (সা.) তার ছেলে হযরত যুবায়েরকে বাধা দিতে নির্দেশ দেন। যুবায়ের ছুটে গিয়ে তাকে বাধা দেয়ার চেষ্টা করলে সাফিয়া তার বুকে এক ধাক্কা দিয়ে তাকে পেছনে ছিটকে দেন। কিন্তু মহানবী (সা.)-এর নির্দেশ শোনার সাথে সাথে থমকে যান। পরে তিনি ধৈর্য ধরার ও আহাজারি না করার শর্তে মহানবী (সা.)-এর কাছ থেকে ভাইয়ের লাশ দেখার অনুমতি পান। তিনি ভাইয়ের কাফনের জন্য দুটি চাদর এনেছিলেন; পরে সেই দুটি চাদর হযরত হামযা (রা.) এবং তার পাশেই পড়ে থাকা আরেকজন আনসারী সাহাবীর কাফনরূপে ব্যবহৃত হয়।

হযরত হামযা (রা.)'র মৃত্যু মহানবী (সা.)-কে এতটা কষ্ট দিয়েছিল যে, ওয়াহশী ও হিন্দা পরবর্তীতে ইসলাম গ্রহণ করলেও তিনি তাদেরকে তাঁর (সা.) সামনে না আসতে অনুরোধ করেন। ওয়াহশী তার এই দুষ্কর্মে প্রায়শ্চিত্ত করার সংকল্প করে এবং ইয়ামামার যুদ্ধে মুসায়লামা কাযযাবকে হত্যা করে তা পূর্ণ করে।

খুতবার শেষদিকে হুযূর (আই.) পুনরায় নির্যাতিত ফিলিস্তিনীদের জন্য দোয়ার আহ্বান জানান। হুযূর দুটি গায়েবানা জানাযারও ঘোষণা দেন যার প্রথমটি হলো গাজার বাসিন্দা মুকাররম শেখ আহমদ হুসায়ন আবু সারদানা সাহেবের যিনি সম্প্রতি ইসরাঈলী বাহিনীর বোমাবর্ষণে ৯৪ বছর বয়সে গাজায় শাহাদত বরণ করেছেন। ইন্না লিল্লাহে ওয়া ইন্না ইলায়হে রাজেউন। সাম্প্রতিক সংঘাতের ঘটনায় তিনিই প্রথম আহমদী শহীদ। তিনি আল্ আযহার বিশ্ববিদ্যালয় থেকে পাস করা বড় মাপের একজন আলেম ছিলেন। হুযূর (আই.) তার আহমদীয়াত গ্রহণের ঈমানোদ্দীপক ঘটনা, কুরআনের প্রতি গভীর ভালোবাসা, খিলাফতের প্রতি ঐকান্তিক ভালোবাসা ও আনুগত্য ইত্যাদির উল্লেখ করেন। হুযূরের কাছে পাঠানো তার একটি অডিও বার্তারও হুযূর উল্লেখ করেন। হুযূর তার জান্নাতে মহান মর্যাদায় অধিষ্ঠিত হবার জন্য দোয়া করেন। শহীদ আবু সারদানা সাহেবের স্ত্রীও এই ঘটনায় আহত হয়েছেন; হুযূর তার সুস্থতার জন্যও দোয়া করেন। দ্বিতীয় গায়েবানা জানাযা ছিল, কেনিয়ার অত্যন্ত নিষ্ঠাবান আহমদী মুকাররম উসমান আহমদ সাহেবের। হুযূর (আই.) তার সংক্ষিপ্ত স্মৃতিচারণে জামা'ত ও খিলাফতের প্রতি তার নিষ্ঠা ও আন্তরিকতা এবং অসাধারণ ধর্মসেবার উল্লেখ করেন এবং জান্নাতে মহান মর্যাদায় অধিষ্ঠিত হবার জন্য দোয়া করেন।

আল্‌হামদুলিল্লাহি নাহমাদুহু ওয়া নাসতায়ীনুহু ওয়া নাসতাগ্‌ফিরুহু ওয়া নু'মিনুবিহী ওয়া নাতাওয়াক্কালু আলাইহি ওয়া না'উযুবিল্লাহি মিন শুরুরি আনফুসিনা ওয়া মিন সায়িয়াতি আ'মালিনা-মাইয়্যাহ্‌দিহিল্লাহু ফালা মুযিল্লালাহু ওয়া মাই ইউয্লিলহু ফালা হাদিয়ালাহু-ওয়া নাশহাদু আল্লা ইলাহা ইল্লাল্লাহু ওয়াহ্দাহু লা শারীকালাহু ওয়ানাশহাদু আন্না মুহাম্মাদান আবদুহু ওয়া রাসূলুহু-

‘ইবাদাল্লাহি রাহিমাকুমুল্লাহু-ইন্নালাহা ইয়া’মুরু বিল ‘আদলি ওয়াল ইহসানি ওয়া ঈ‘তাইযিল কুরবা ওয়া ইয়ানহা ‘আনিল ফাহশাই ওয়াল মুনকারি ওয়াল বাগ্‌ই-ইয়াইযুকুম লা’আল্লাকুম তাযাক্করুন। উযকুরুল্লাহা ইয়াযকুরুকুম ওয়াদ’উহু ইয়াসতাজিবলাকুম ওয়ালা যিক্‌রুল্লাহি আকবর।

(‘মজলিশ আনসারুল্লাহ ভারত’ কর্তৃক প্রকাশিত সংক্ষিপ্ত উর্দু খুতবার অনুবাদ)

<p>Bengali Khulasa Khutba Juma Huzoor Anwar^(at) 22 December 2023 Distributed by</p>	<p>To,</p> <p>-----</p> <p>-----</p> <p>-----</p> <p>-----</p>
<p>Ahmadiyya Muslim MissionP.O..... Distt.....Pin.....W.B</p>	<p>-----</p> <p>-----</p>
<p>বিশদে জানতে : Toll Free No.1800 103 2131 www.alislam.org www.mta.tv www.ahmadiyyamuslimjamaat.in</p>	

Summary of Friday Sermon, 22 December 2023 Bengali 4/4; Translated by Bangla Desk Qadian